

RAMAZANSKI BAJRAM (1. Ševval 1447. H. god.)

Neka je hvala Allahu, dž.š., Gospodaru svih svjetova, Koji nam je iz Svoje neizmjerne milosti omogućio da ispratimo još jedan mubarek-mjesec Ramazan i da u ovoj našoj lijepoj džamiji dočekamo dragi Bajram. Neka su salavat i selam na našeg Poslanika i Miljenika Muhammeda, s.a.v.s., koji je rekao "**Amin!**" na Džibrilovu dovu: "Neka je daleko od nas onaj koji dočeka kraj Ramazana a da nije čist od grijeha." Neka su salavat i selam na njegovu časnu porodicu, ashabe i sve sljedbenike, koji se istovremeno i raduju Bajramu a i žale zbog odlaska mjeseca Ramazana.

Braćo moja u Dini Islamu! Iza nas je mjesec Ramazan, koji nam je donio dvadeset i devet dana ispunjenih Allahovim blagodatima i milošću. Onaj ko ih je iskoristio sigurno se puno umorio, ali je danas sretan jer će od Gospodara svjetova dobiti nagradu za učinjene ibadete i bit će mu oprošteni prethodni grijesi. A onaj ko nije iskoristio ramazanske blagodati sigurno se nije umorio, ali danas ima za čime da žali jer je propustio veliku šansu koja se nudi samo jednom godišnje, a pri tome još ne zna hoće li dobiti iduću šansu. Naravno, ibadeti nisu vezani isključivo za mjesec Ramazan, tako da se i pred jednim i pred drugima otvaraju vrata dnevnih, sedmičnih i mjesečnih ibadeta i u idućih jedanaest mjeseci, do novog mjeseca Ramazana. S tim što osjećaji i nagrade kod tih ibadeta nisu iste kao u mjesecu Ramazanu, jer je mjesec Ramazan jedan poseban period i jedan sasvim nadrealan svijet. Svijet, u koji kada vjernik uđe, nikada više ne poželi da izađe i da se vrati u realnost.

U tom svijetu melekuta, kako ga naziva hzr. Aiša, r.a., vjernik trenira svoje tijelo i dušu i pri tome gradi svijest o prolaznosti ovog svijeta, priprema sebe psihički za susret sa svojim Gospodarom i uči da materijalne stvari nisu najvažnije u životu te da one predstavljaju samo kratko i varljivo uživanje. U cilju podsjećanja na to stanje i podsticanja na njegovo održavanje Poslanik, s.a.v.s., je preporučio vjernicima da poste po tri dana svakog mjeseca, posebno naglasivši vrijednost posta šest dana mjeseca Ševvala te Dana Arefata i Dana Ašure.

S tim u vezi je i priča koja govori da je Zubejda (supruga halife Haruna Er-Rešida) jednog dana izašla na Bagdadsku tržnicu da kupi sebi svilu. Usput je srela Behlula, koga su ljudi smatrali ludim a ustvari je bio evlija, kako crta kuću u pijesku. Upitala ga je šta radi, a on joj reče da pravi kuću. Ona upita da li je kuća na prodaju, a on reče da jeste. Upitala je za cijenu, a on reče 10 dinara (zlatnika). Ona mu dade zlatnike, a on ih podijeli siromasima, a zatim joj reče: "Da znaš samo kakvu si kuću sebi kupila!" Ne obraćajući pažnju na to, ona je krenula dalje za svojim poslom.

Sutradan ujutro, dok je ispijala jutarnju kahvu sa svojim mužem, Harun joj reče da je usnio čudan san. Sanjao je kako ga je melek vodio po Džennetu i da je vidio neopisive ljepote, ali da ga se najviše dojmio jedan dvorac. Kada je upitao meleka čiji je to dvorac, melek mu je rekao da je Zubejdin. Zubejda tada zaplaka te mu ispriča slučaj sa Behlulom.

U želji da se domogne iste nagrade halifa požuri na gradsku tržnicu da pronade Behlula. Pronašao ga je kako crta kuću u pijesku i ispitao na isti način kao što je to jučer učinila Zubejda. Međutim, Behlul je ovog puta tražio 10 miliona dinara. Zaprepašten halifa upita: "Otkud sad toliko? Jučer si Zubejdi prodao za samo 10 dinara?" Behlul ga pogleda, pa se nasmija i reče mu: "Eee, moj halifa, nije to isto. Ti si sinoć vidio kakva je Zubejdina kuća, a Zubejda ju je kupila na neviđeno."

Upravo je to poruka i cilj svih naših ibadeta – kupovina Džennetskog dvorca na neviđeno. Gospodar svjetova ga je obećao vjernicima i oni se bore da ga steknu, iako ga nisu vidjeli.

I mi smo, braćo moja, kupili nazad drugi džematski stan na neviđeno. I mnoge naše džematlije su već dale dobrovoljne priloge za isplatu kredita za stan, a da stan uopće nisu ni vidjele. Mi im se od srca zahvaljujemo i koristimo priliku da pozovemo i druge koji su u mogućnosti da daju svoje novčane priloge, kako bi kredit za stan što prije bio isplaćen, akobogda.

A na koji način će se stan koristiti kada se još malo sredi i renovira, to ćete odlučiti vi – naše džematlije, na džematskoj skupštini koja je sazvana za nedjelju 19. aprila u 14 h u našoj džamiji. Tom prilikom ćemo i dopuniti praznine u našem džematskom odboru, te vas s toga još jednom srdačno pozivamo i molimo da se odazovete i da u što većem broju dođete na Skupštinu. Dajte svoj doprinos svome Džematu! To je vaše pravo i vaša dužnost kao džematlija! I tako vam Allaha, kada dajete doprinos svome Džematu, neka to bude u ime Allaha, a ne radi vlastitih interesa!

S tim u vezi želim da naglasim još jednu važnu stvar. Riječ džemat znači zajednica, a ne džamija. Džematske aktivnosti nisu isključivo džamijske aktivnosti. Možda u Bosni i Hercegovini u većini slučajeva jeste tako, ali ovdje na Zapadu džemat je ujedno i džamija i udruženje. Prema tome, nikome ne treba da smeta ako džemat organizuje Kermez (teferič), turnir u fudbalu ili narodno veselje u sali. Tim prije, što mnogi ljudi ne dolaze u džamiju, ali vrlo rado dođu na manifestacije izvan džamije. U tom smislu najavljujem i pozivam vas na narodno veselje koje organizuje naš Džemat, a koje će biti upriličeno u subotu 11. aprila u Gemeindesaal u Schwarzachu.

Na kraju, molim Dragog Allaha da nam ukabuli naš post, dove i ostale ramazanske ibadete, da nam oprost naše grijehe, spasi nas od Džehennema i uvede u lijepi Džennet. Amin.

U svoje ime i ime našeg džematskog odbora, od srca vam želim hajirli i beričetne dane Ramazanskog bajrama, sa dovom Dragom Allahu da ih provede u zdravlju i veselju zajedno sa svojim najmilijim.

BAJRAM ŠERIF MUBAREK OLSUN!